

Despuch û pa d'ores aquet segoun dimenye sé de coaresme, lous lugrâs que s'èren abitats à la capère dou cèu de Sen Roumas. Au corn dou hoec de la cousine de Hique, maysou de paysa estremade dou biladye, dues hemnes prou yoénes, l'ue drin mey que l'aute, que-s cauhaben chens ha ni disé arré. La loue care que dabe endiques d'û tarrible malur ou d'û gran esbàrye. A û moumen dat, que truquèn à la porte qui dabe tau beryè. La mey anciène de las dues qu'anè desbarroulha, û omi qu'entrè.

« Adichat, se digou tout arrident. – Adiu Manoèl, se hé chens lheba lous oelhs la qui s'ère estade au cor dou hoéc. » L'omi que hé dus pas endaban coum susprés. « Marthe, qu'éy ço qui y a, lous chins be soun au lhéyt ? - O bé, qu'éy soun lous praubots, mercés à Diu, se respounou la mediche en se gahan à ploura. L'Espagnòu (coum lou sou noum at disè, espagnòu qu'ère) que s'abancè dinq'au miey de la cousine. Coum la màye partide dous òmis de la soue souque, n'ère pas gran, més arremassat dou cos e court de comes. Lous oelhs qu'abè gris, lous pots espés, lou nas arrecussat, qu'ère brun chens esta mourét. N'ère pas lè, la soue care rasade qu'amuchabe de trente ans à capsus. Badut à Huesca en Aragou, darrè maynat d'ue coade de onze, lou sou pay, béudou despuch hère e deya bielh, que-s mouri. L'aynat de la familhe, maridat e amaynat, qu'ou s'arrecattè p'ou moumen. Més coum l'abè à carque, qu'ou n'embie ta û paren qui hasè drin de coumèrce à Bedous en Aspe enta qu'ou hiquèsse baylet enço d'û paysa.